



XUNTA DE GALICIA
CONSELLERÍA DE FACENDA

	VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA DIRECCIÓN XERAL DE RELACIÓNS INSTITUCIONAIS E PARLAMENTARIAS
	DATA DE ENTRADA: 12 SET. 2017 REXISTRO DE CONVENIOS

CONVENIO DE COLABORACIÓN ENTRE A CONSELLERÍA DE FACENDA E A ASOCIACIÓN SEN ÁNIMO DE LUCRO GEN PLUS PARA A ORGANIZACIÓN DE DOUS OBRADOIROS DE TRABALLO SOBRE A REDIFINIÇÃO DA POLÍTICA FISCAL E A ESTABILIDADE FISCAL NO ÁMBITO AUTONÓMICO.

En Santiago de Compostela, 19 de xuño de 2017

REÚNENSE


Dunha parte Don Valeriano Martínez García, como Conselleiro de Facenda da Xunta de Galicia para cuxo cargo foi nomeado polo Decreto 148/2016, do 13 de novembro, e que actúa en representación da Consellería de Facenda da Xunta de Galicia (en adiante a CONSELLERÍA) consonte o disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

E doutra parte, Don Santiago Lago Peñas, maior de idade, con DNI 33 296 581 X que intervéñ, en nome e representación da Asociación GEN PLUS con CIF G 32 474 215, como presidente.

Amba as dúas partes recoñécense mutuamente, na cualidade en que interveñen, capacidade legal suficiente para o outorgamento deste convenio e para o efecto,


EXPOÑEN

I



O Acordo 6/2009 do Consello de Política Fiscal e Financeira (CPFF), do 15 de xullo, para a reforma do sistema de financiamento das Comunidades Autónomas, creou o Comité Técnico Permanente de Evaluación (CTPE) no seo do devandito órgano.

O CTPE foi ademais recollido na Lei 22/2009, do 18 de decembro, pola que se regula o Sistema de Financiamento das Comunidades Autónomas de réxime común e Cidades con Estatuto de Autonomía.





Na súa Disposición Adicional Sétima establécese que o CTPE "*valorará os distintos aspectos estruturais do Sistema de Financiamento, con carácter quinquenal, para informar sobre as posibles modificacións que se poidan someter á consideración do Consello de Política Fiscal e Financeira, en aras dunha mellor coordinación financeira, garantindo a autonomía e suficiencia das Comunidades e o equilibrio e sustentabilidade do sistema.*"

Co ánimo de emprender o proceso de análise e revisión do vixente modelo nos termos e prazos previstos na Lei orgánica 8/1980, do 22 de setembro, de financiamento das Comunidades Autónomas, e na Lei 22/2009, do 18 de decembro, creouse o grupo de traballo do CTPE mediante Acordo do CPFF do 21 de marzo de 2013.

A función que se lle encomendou a este grupo de traballo foi a de analizar o efecto da aplicación do Sistema de Financiamento co obxecto de elevar a devandita análise ao CTPE.

II

A Comunidade Autónoma de Galicia debe elaborar, neste marco, unha proposta concreta de sistema de financiamento acorde aos seus intereses e necesidades.

III

A Subdirección Xeral de Recursos e Análises Orzamentario, dependente da Dirección Xeral de Planificación e Orzamentos ten encomendada, segundo o Decreto 30/2017, do 30 de marzo, polo que se establece a estrutura orgánica da Consellería de Facenda, a seguinte función: "A realización das actuacións necesarias para a determinación e seguimento dos recursos derivados do sistema de financiamento das Comunidades Autónomas".

IV

A Asociación sen ánimo de lucro GEN PLUS (Governance and Economics research Network), presidida polo profesor Lago Peñas, desenvolve as súas actuacións de investigación en torno a tres campos, gobernanza e economía pública, economía sectorial e rexional e empresa familiar. No que atinxe á primeira liña de actuación, GEN PLUS parte dunha perspectiva interdisciplinar que integra expertos de múltiples ramas dende a ciencia política ata a xeografía económica. A súa análise abrangue todas as vertentes da actividade financeira do sector



público, o ingreso e o gasto, prestando especial atención ás relacións intergubernamentais federais e aos procesos de descentralización.


GEN PLUS é membro de ECOBAS, agrupación promovida pola Universidade de Vigo que pretende unificar e consolidar a colaboración entre os grupos de investigación de referencia no ámbito da economía e a empresa para maximizar o impacto, académico, económico e social, das súas actividades de I+D+I, tanto a nivel rexional, como nacional e internacional.

No primeiro semestre de 2017 a Asociación GEN PLUS organizará un obradoiro de traballo sobre a estabilidade fiscal no ámbito autonómico. Estudaranse os criterios de reparto do déficit entre os diferentes niveis de goberno e entre os gobernos autonómicos; a utilidade e conveniencia de fondos de estabilización; a incorporación de mecanismos de axuste automático de ingresos a conta e anticipos ante situacións de caída de ingresos e as posibles fórmulas de metabolización do Fondo de Liquidez Autonómica (FLA) para os gobernos máis endebedados.

No segundo semestre GEN PLUS organizará un obradoiro de traballo para estudar a redifinición da política fiscal española e do Fondo de Compensación Interterritorial así coma as vías para recuperar esforzos endóxeos de desenvolvemento rexional. Esta redifinición é necesaria nestes momentos en que está a darse unha caída progresiva dos fondos comunitarios unida á persistencia de diferencias no nivel de desenvolvemento rexional e, ademais, moi importante para esta Comunidade Autónoma pola súa importancia para o seu futuro económico.

As conclusións dos ditos obradoiros de traballo serán públicas e estarán dispoñibles na páxina web da asociación.

V



Ambas entidades son conscientes da importancia e da responsabilidade que tanto as institucións coma as entidades teñen en colaborar no proceso de redifinición e busca dun sistema de financiamento autonómico que respondan aos intereses de Galicia.

VI

A Consellería de Facenda considera que é de interese xeral dispoñer da máxima información sobre novas fórmulas de política fiscal e de novos mecanismos de ingresos de xeito que lle permitan superar de cara ao futuro as debilidades



detectadas no actual sistema de financiamento así coma adquirir unha estabilidade e un nivel de desenvolvemento económico óptimo.

A proposta dun novo modelo acorde ás necesidades e á realidade galega esixe un traballo exclusivo e pormenorizado así como o coñecemento do detalle dos traballos realizados neste campo polos expertos na materia.

Ademais, o feito de que sexa a Asociación sen ánimo de lucro GEN PLUS a que organiza as ditas actividades xustifica, para os efectos do establecido no artigo 26.2 da Lei 9/2007, do 13 de xuño, de subvencións de Galicia, que a consellería lle outorgue á dita entidade unha axuda de concesión directa para realizar as actividades obxecto do convenio ao non poder promoverse a concorrência por ser nestes momentos esta asociación a que está a realizar, a través dos obradoiros, a difusión dos estudos que se realizan polos expertos no campo do financiamento autonómico.

A Asociación sen ánimo de lucro GEN PLUS cumpre cos requisitos para ter a condición de beneficiario da subvención, de acordo co disposto no artigo 10 da Lei 9/2007, do 13 de xuño, de subvencións de Galicia.

Polo exposto, considerase de gran utilidade apoiar financeiramente a celebración das actividades da Asociación GEN PLUS.

En consecuencia, ambas partes acordan asinar este convenio de colaboración con suxeición as seguintes cláusulas:

CLÁUSULAS

PRIMEIRA.- Obxecto do convenio

O obxecto deste convenio é outorgar unha subvención de concesión directa, segundo o disposto no artigo 19.4 da Lei 9/2007, do 13 de xuño, de subvencións de Galicia, á Asociación GEN PLUS para o desenvolvemento das actuacións que se relacionan na cláusula segunda.

SEGUNDA.- Actividades que se subvencionan

A Asociación GEN PLUS realizará:





- Un obradoiro de traballo sobre a redifinición da política fiscal autonómica en España no que se analizará o Fondo de Compensación Interterritorial e novas vías de recuperación de esforzos endóxeos para o desenvolvemento rexional.
- Un obradoiro de traballo sobre a estabilidade fiscal no ámbito autonómico no que se estudarán, entre outros temas, os actuais criterios de reparto do déficit e os fondos de estabilización.

TERCEIRA.- Obrigas da Asociación GEN PLUS

Ademais das establecidas con carácter xeral na Lei 9/2007, do 13 de xuño, de subvencións de Galicia e na súa normativa de desenvolvemento, son obrigas da Asociación GEN PLUS:

1. Presentar, con carácter previo á sinatura do convenio, unha declaración responsable na que se faga constar que a Asociación GEN PLUS non está incurso en ningunha das prohibicións establecidas no artigo 10, número 2 da Lei 9/2007, do 13 de xuño, de subvencións de Galicia para obter a condición de beneficiario dunha subvención.
2. Destinar os fondos que se perciban ao obxecto concreto para o que se concede esta subvención, executar as actuacións que constitúen o obxecto deste convenio e cumprir todas as condicións e obrigas recollidas nel.
3. Xustificar ante o órgano concedente o cumprimento da finalidade da subvención, realización da actividade e o seu custo real.
4. Incorporar a imaxe corporativa da Xunta de Galicia – Consellería de Facenda segundo establece o Decreto 409/2009, do 5 de novembro (DOG nº 227 do 19/11/2009) polo que se aproba o uso dos elementos básicos da identidade corporativa da Xunta de Galicia. Esta imaxe será incorporada en todos os soportes que se utilicen.
5. Prestar a colaboración e facilitar tanta documentación lle sexa requirida, no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Contas, así como o sometemento ás actuacións de supervisión e control previstas na Lei 9/2007, do 13 de xuño, de subvencións de Galicia, así como as xerais derivadas da aplicación da normativa de axudas e subvencións.





CUARTA.- Obrigas da Consellería de Facenda

A Consellería de Facenda comprométese a colaborar coa Asociación GEN PLUS para a finalidade deste convenio coa achega económica estipulada na cláusula quinta.

QUINTA.- Financiamento

O importe total da achega prevista no convenio ascende a un total de corenta mil euros (40.000 €) que se financiará con cargo á aplicación orzamentaria 06.01.612A.481.0 correspondente aos orzamentos xerais da Comunidade Autónoma de Galicia para o ano 2017.

A dita achega financiará exclusivamente o custo de realización das actividades obxecto deste convenio sen que ningunha das partes convenientes poida obter ningún lucro.

Ao abeiro deste convenio poderán financiarse os gastos das actividades derivados deste convenio realizados desde o 1 de xaneiro de 2017 ata o 30 de novembro de 2017.

Ao abeiro do establecido no artigo 63 do Decreto 11/2009, de 8 de xaneiro, polo que se aproba o Regulamento da Lei 9/2007, de 13 de xuño, de subvencións de Galicia e coa finalidade de que poidan levar a cabo as actividades obxecto do convenio, realizarase un pagamento anticipado de 16.600 euros logo da sinatura do convenio.

SEXTA.- Xustificación e pagamento

Para percibir o importe desta subvención, a Asociación GEN PLUS deberá:

- Acreditar que se atopa ao corrente das súas obrigas tributarias e fronte á Seguridade Social e que non ten pendente de pagamento ningunha outra débeda coa administración pública da Comunidade Autónoma e que non é debedora por resolución de procedemento de reintegro.
- Acreditar que realizou as actividades obxecto deste convenio. Presentarán unha copia da documentación que se elabore.
- Presentar unha certificación que acredite a realización das actuacións previstas neste convenio así coma o investimento da totalidade da subvención na realización das ditas accións e o pagamento efectivo das actividades



realizadas. Con esta certificación deben achegarse os xustificantes correspondentes que consistirán en facturas dos gastos realizados afectos á actividade, acompañados dos comprobantes do seu pagamento, xa sexa por transferencia bancaria ou por talón nominativo.

No caso de que os gastos sexan de persoal que participase nas actividades obxecto deste convenio deberanse presentar as nóminas e os comprobantes do seu pagamento, así como unha memoria xustificativa de adscrición deste persoal ao desenvolvemento da actividade obxecto deste convenio.

A documentación xustificativa deberá entregarse na Consellería de Facenda antes do 20 de decembro de 2017 agás os xustificantes dos pagamentos das retencións do IRPF dos salarios e outras retribucións do persoal correspondentes ao último trimestre de 2017 que se xustificará antes do 31 de xaneiro de 2018.

A Consellería de Facenda realizará o pagamento restante da subvención á Asociación GEN PLUS unha vez comprobada a súa xustificación.

No caso de que a xustificación dos gastos sexa inferior ao importe do convenio, as achegas da Consellería de Facenda diminuiranse proporcionalmente.

SÉPTIMA.- Perda do dereito ao cobro da subvención. Reintegro

Producirase a perda do dereito ao cobro da subvención no suposto do incumprimento das condicións establecidas para a súa concesión.

A Asociación GEN PLUS estará obrigada ao reintegro, total ou parcial, das cantidades percibidas e dos xuros de demora correspondentes nos supostos previstos no artigo 33 da Lei 9/2007, de 13 de xuño, de subvencións de Galicia.

A non xustificación do pagamento do IRPF antes do 31 de xaneiro de 2018 suporá o inicio dun expediente de reintegro pola cantidade percibida por ese concepto e dos correspondentes intereses de demora.

Así mesmo, o incumprimento da cláusula décimo terceira respecto da publicidade da colaboración da Xunta de Galicia – Consellería de Facenda dará lugar a unha minoración do 2% sobre o importe definitivamente xustificado.



OITAVA.- Causas de resolución

Son causas de resolución do convenio :

- a) O incumprimento total ou parcial dalgunha das súas cláusulas.
- b) O transcurso do tempo estipulado sen que se culminen as actividades acordadas.

NOVENA.- Vixencia do convenio

Este convenio entrará en vigor o día da súa sinatura e estenderá a súa vixencia ata o 20 de decembro de 2017 sen prexuízo de que poidan subvencionarse actividades realizadas con anterioridade á sinatura do convenio.

DÉCIMA.- Exoneración de responsabilidade

A subscrición deste convenio non xerará relación laboral, contractual ou de calquera outro tipo entre os profesionais que vaian desenvolver as actividades obxecto deste acordo e maila Administración Autonómica, de xeito que non se lle poderá esixir á Consellería de Facenda ningunha responsabilidade nin directa nin indirecta nin subsidiaria polos actos ou feitos acaecidos no desenvolvemento do mesmo.

DÉCIMO PRIMEIRA.- Comisión de interpretación e seguimento

Constituirase, de ser o caso, unha Comisión de interpretación e seguimento do convenio, composta por dous representantes nomeados polo conselleiro de Facenda e outros dous pola Asociación GEN PLUS, que resolverá as controversias sobre a súa interpretación e execución.

A comisión reunirse a instancia de calquera das partes e rexerase, en canto ao seu funcionamento e réxime xurídico, pola normativa específica en vigor.





DÉCIMO SEGUNDA.- Solución de controversias

As controversias sobre a interpretación e execución deste convenio de colaboración serán resoltas de mutuo acordo entre as partes na comisión de interpretación e seguimento prevista na cláusula anterior.

Se non se chegase a acordo, as posibles controversias deberán ser resoltas na vía administrativa segundo o disposto na Lei 39/2015, de 1 de outubro, do Procedemento Administrativo Común ou norma que a substitúa e, de continuar o desacordo, na forma prevista na Lei 29/1998, do 13 de xullo, reguladora da Xurisdición Contencioso-Administrativa.

DÉCIMO TERCEIRA.- Publicidade da colaboración das partes

De conformidade co previsto na cláusula segunda, Asociación GEN PLUS deberá dar axeitada publicidade da participación da Consellería de Facenda nas actividades obxecto deste convenio. No material que se utilice e se reparta con motivo dos eventos e das actividades que se realicen, ao amparo deste convenio, deberá facerse constar a colaboración desta consellería.

DÉCIMO CUARTA.- Compatibilidade da subvención

A subvención regulada neste convenio é compatible coa percepción de calquera outra achega económica para a mesma finalidade sempre e cando o conxunto das axudas non supere o custo e se evite o dobre financiamento.

A Asociación GEN PLUS queda obrigada a comunicarlle á Consellería de Facenda no momento en que o coñeza calquera outra axuda que poida percibir para a mesma finalidade. A dita comunicación efectuarase, en todo caso, xunto cos documentos xustificativos da axuda.

DÉCIMO QUINTA.- Rexistro de convenios e publicidade da axuda

A sinatura deste convenio supón o consentimento expreso por parte da Asociación GEN PLUS para que a Administración galega inclúa e faga públicos os datos referidos ao dito convenio, de conformidade co artigo 15 da Lei 1/2016, do 18 de xaneiro, de transparencia e bo goberno e cos Decretos 126/2006, do 20 de xuño, e 132/2006, do 27 de xullo, polos que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.



De conformidade coa Lei 38/2003, do 17 de novembro, xeral de subvencións, o instrumento de colaboración e a información sobre a subvención serán comunicados á Base de datos nacional de subvencións (BDNS).

DÉCIMO SEXTA.- Publicidade no Portal de Transparencia e Goberno Aberto

Os asinantes deste convenio manifestan o seu consentimento a que os seus datos persoais que consten no convenio, e mailo resto das especificacións contidas no mesmo, sexan publicados no Portal de Transparencia e Goberno Aberto.

DÉCIMO SÉPTIMA.- Natureza do convenio

Este convenio ten natureza administrativa e rexerase polo disposto nas súas cláusulas, pola Lei 39/2015, do 1 de outubro, do Procedemento Administrativo Común das Administracións Públicas ou norma que a substitúa e polas demais normas de dereito administrativo aplicable. As cuestións litixiosas que poidan xurdir na súa interpretación e cumprimento serán de coñecemento e competencia da Xurisdición Contencioso-Administrativa.

DÉCIMO OITAVA.- Normativa aplicable

En todo o non previsto expresamente neste convenio estarase ao disposto na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei de Subvencións.

As partes asinan este convenio por duplicado en proba de conformidade no lugar e data arriba indicados.

O CONSELLEIRO DE FACENDA,



Valeriano Martínez García

O PRESIDENTE DA
ASOCIACIÓN GEN PLUS

ASOCIACIÓN
Santiago Lago Peñas



CIF G-32474215